

**Piffissaq sapaatip akunneranut nalinginnaasumik suliffiusarteq ullumikkut nalunaaquttap akunnerani 40-sunit 35-inut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuineq UPA 2025 nallertinnagu Inatsisartunut agguanneqassaaq.**  
(Inatsisartuni ilaasortaq, Anna Wangenheim, Demokraatit)

### **Akissuteqaat**

(Isumaginninnermut, Ilaqutariinnut, Suliffeqarnermut Nunamullu Namminermut Naalackersuisoq)

### **Siullermeerneqarnera**

Qujanaq Anna Wangenheim, piffissaq sapaatip akunneranut nalinginnaasumik suliffiusarteq ullumikkut nalunaaquttap akunneri 40-sunit 35-nut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaanik misissueqqullugit Naalackersuisut peqquneqarnissaannik Inatsisartut aalajangiiffigisassaattut siunnersuuteqaravit.

2015-imi aamma 2017-imi Island sapaatip akunneranut sivikinnerusumik nalunaaquttap akunnerinik sulisarnermut tunngasumik misiliisimavoq, pisortani suliffeqartut inuit 2.500-it misiliutigineqarlutik. Islandimi ulloq naallugu sulisartunut inatsit imaappoq, sapaatip akunneranut nalunaaquttap akunneri 40-t suliffiussasut. Kattuffiilli ataasiakkaat isumaqatigiissutaanni itisilernerullugu nassuiarneqartarpoq, sulinerup sivisussusia qanoq aaqqissuunneqassanersoq. Imaappoq, sapaatip akunneranut sivikinnerusumik sulineq anguneqartarpoq kattuffiit isumaqatiginninniarsinnaasut aqutigalugit, inatsisitiguunngitsoq.

OECD-ip Islandip aningaasaqarneranut misissuinermini innersuussivoq, aningaasarsiat ineriartornerannik aamma sulinermi angusaqarsinnaassutsip annertussusianik takussutaasinnaasunik, Islandip sulinermi angusaqarsinnaassutsip aamma akissarsiat annertussusiannik kisitsisinik katersisarnera pitsannagortinneqartariaqartoq, branchekkaartumik immikkoortiterlugit imaluunniit suli itisilernerusamik suliffeqarfikkaartumik immikkoortiterlugit. Allatut oqaatigalugu: Sukumiisumik misissueqqissaarneq piffissamik pisariaqartitsivoq.

2023-mi Naalackersuisut Suliffeqarnermut Nalunaarusiaat takutitsivoq, ukiuni tulliuttuni inuiaqatigiit agguataarnerisa ineriartornerata suliffeqarneq malunnaatilimmik sunnerumaaraa. Sulisussaaleqineq nalinginnaasumik pineqartillugu aamma inuiaqatigiinni utoqqaat amerleriarnissaat eqqarsaatigalugu. Suliamik naammassinnissinnaaneq ilaatigut utoqqaat illuini sulisut amerlineqarnerisigut attatiinnarniarneqarsinnaavoq. Utoqqaat illuini sulisut amerlineqarpata peqatigisaanik pisortani aningaasartuutit qaffakkumaarput. Taamaattumik kiffartuussinermi paaqqutarinninnermilu aningaasartuutit ilimanaatilimmik qaffannissaat eqqumaffigissallugu pingaaruteqarpoq, torersumik politikkikkut isummerfigineqarnissaanut tunngavissaqarluarnissaq pisariaqarmat.

Maani nunami suliffeqarneq iluseqarpoq ima, suliffeqarnermut susassaqaqatigiit akornanni sulinerup sivisussusia isumaqatigiissutaalluni. Tamanna inatsisitigut aalajangiussaannigilaq. Taamaattumik pingaaruteqarluinnarpoq uani sammisami pingaaruteqartumi suliffeqarnermut illuatungeriit ilanngunneqarnissaat.

Paasineqareerpoq, suliffeqarnermi immikkoortuni arlalinni sulisussaaleqineq pioreersoq. Nalunaaquttap akunneri suliffissat sivikinnerusut sulisut amerlassusiat nikisinnagu, suliffeqarfiit suliarnit naammassisaqarsinnaassusiata apparnera kingunerisinnaavaa, pingaartumik amerlanerusut sulilinngippata. Tamatuma saniatigut 40 tiiminit annikinnerusumik sapaatip akunneranut sulisarneq eqqunneqarpat, suliffeqarfinni namminersortunut qanoq isumaqarumaarnersoq, aamma naatsorsuisoqanngilaq. Kisianni misissorneqarnissaa iluatinnaateqarpoq.

Qulaani isumaliutit tunngavigalugit Naalakkersuisut allannguutissatut siunnersuummik ima saqqummiussaqaarput:

**“Piffissaq sapaatip akunneranut nalinginnaasumik suliffiusartooq ullumikkut nalunaaquttap akunnerini 40-sunit 35-nut imaluunniit 37-nut appartinneqarpata, tamatuma aningaasatigut, inuiaqatigiinnut peqqissutsikkullu kingunerisassaani misissueqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut. Misissuineq UKA 2025 nallertinnagu Inatsisartunut agguanneqassaaq.”**